

**Z A K O N  
O IZVRŠAVANJU BUDŽETA  
FEDERACIJE BOSNE I HERCEGOVINE  
ZA 2012. GODINU**

**Sarajevo, decembar 2011. godine**

## Z A K O N

### O IZVRŠAVANJU BUDŽETA FEDERACIJE BOSNE I HERCEGOVINE ZA 2012. GODINU

#### I. Opće odredbe

##### Član 1.

Ovim zakonom se uređuje struktura prihoda i primitaka te rashoda i izdataka Budžeta Federacije Bosne i Hercegovine za 2012. godinu (u daljem tekstu: Budžet) i njegovo izvršavanje, prioriteti plaćanja, opseg zaduživanja i garancija, upravljanje javnim dugom, te finansijskom i nefinansijskom imovinom, prava i obaveze korisnika budžetskih sredstava (u daljem tekstu: korisnika), ovlaštenja Vlade Federacije Bosne i Hercegovine (u daljem tekstu: Vlada), Federalnog ministarstva finansija (u daljem tekstu: Ministarstvo finansija) i federalnog ministra finansija (u daljem tekstu: ministar finansija), u izvršavanju Budžeta za tekuću godinu, kazne za neispunjenje obaveza te druga pitanja u izvršavanju Budžeta.

#### II. Struktura prihoda i primitaka te rashoda i izdataka

##### Član 2.

Budžet se sastoji od općeg i posebnog dijela i plana razvojnih programa.

Opći dio Budžeta čini Račun prihoda i rashoda i Račun finansiranja.

Posebni dio Budžeta sastoji se od plana rashoda i izdataka budžetskih korisnika raspoređenih u tekuće i razvojne programe za tekuću budžetsku godinu.

U bilansi prihoda i izdataka iskazuju se porezni i neporezni prihodi i drugi prihodi i primici te izdaci utvrđeni za finansiranje javnih izdataka na nivou Federacije Bosne i Hercegovine (u daljem tekstu: Federacija) na temelju zakonskih i drugih propisa.

U računu finansiranja iskazuju se zaduživanja i otplate dugova uzetih radi uravnoteženja salda bilanse prihoda i rashoda Budžeta.

##### Član 3.

Račun prihoda i rashoda Budžeta sastoji se od:

###### 1) P r i h o d a

- poreza koji su utvrđeni zakonom,
- neporeznih prihoda kao što su prihodi od poduzetništva i imovine,
- administrativne i sudske naknade i takse i novčane kazne,
- prihoda ostvarenih obavljanjem osnovne djelatnosti i ostalih poslova budžetskih korisnika.

###### 2) R a s h o d a

- za zaposlene, kao što su tekući izdaci za plaće, naknade, izdaci za materijal i usluge,
- tekući transferi i plaćanje kamata,
- za subvencije, pomoći i naknade,
- kapitalni transferi.

U Računu finansiranja iskazuju se primici od finansijske i nefinansijske imovine, inostranih i domaćih potpora (transferi) i primljeni krediti i zajmovi, te izdaci za finansijsku i nefinansijsku imovinu i za otplatu zajmova i kredita.

#### **Član 4.**

Raspodjela prihoda od indirektnih poreza, koji se prenosi na Jedinostveni račun Trezora Federacije (u daljem tekstu: JRT) vrši se između korisnika u Federaciji, na osnovu odnosa i kriterija raspodjele utvrđene u Zakonu o pripadnosti javnih prihoda u Federaciji Bosne i Hercegovine («Službene novine Federacije BiH», broj 22/06, 43/08 i 22/09).

### **III. Izvršavanje Budžeta**

#### **Član 5.**

Sredstva Budžeta osiguravaju se budžetskim korisnicima koji su u Posebnom dijelu Budžeta određeni za nosioce sredstava na pojedinim pozicijama.

#### **Član 6.**

Korisnici koriste budžetska sredstva samo za namjene koje su određene Budžetom, a u skladu sa svojim godišnjim finansijskim planom i po dinamici, utvrđenoj tromjesečnim i mjesečnim planovima koje odobrava ministar finansija na temelju plana novčanih tokova, putem kojih se projiciraju sve uplate i isplate sa JRT.

#### **Član 7.**

Na osnovu alokacije budžetskih sredstava i instrukcije Ministarstva finansija, korisnici pripremaju i podnose prijedloge operativnih budžeta Ministarstvu finansija.

Korisnici moraju pri ispunjavanju obaveza koje se podmiruju iz Budžeta uzimati u obzir utvrđenu dinamiku priliva i odliva sredstava.

Ministarstvo finansija izvijestit će budžetske korisnike o odobrenim operativnim budžetima.

#### **Član 8.**

Korisnici preuzimaju obaveze za koje su sredstva namjenski iskazana u Posebnom dijelu Budžeta ako je njihovo plaćanje usklađeno s mjesečnim planom izvršavanja.

Iznimno, zbog neusklađenog priliva sredstava u Budžet prema mjesečnim planovima izdataka, Ministarstvo finansija može izmijeniti dinamiku doznake sredstava pojedinim korisnicima.

## **Član 9.**

Ministarstva koja u svom razdjelu sadrže budžetske potrošačke jedinice-glave, budžetski su nadležna za njih i utvrđuju mjesečne i tromjesečne računске planove izvršavanja izdataka svojih korisnika u okviru odobrenih sredstava.

## **Član 10.**

Korisnici su obavezni Ministarstvu finansija dostavljati tromjesečne finansijske planove za izvršenje Budžeta 15 dana prije početka tromjesečja. Tromjesečni planovi su okvirni planovi.

Korisnici su obavezni Ministarstvu finansija i to do 20. u tekućem mjesecu, dostavljati prijedlog mjesečnog računskog plana za sljedeći mjesec po pozicijama utvrđenim budžetom korisnika.

Ako korisnik Ministarstvu finansija ne podnese prijedlog mjesečnog finansijskog plana u roku iz stava 2. ovoga člana, mjesečni plan za tog korisnika utvrđuje Ministarstvo finansija.

## **Član 11.**

Budžet će se izvršavati po sljedećim prioritetima:

1. otplate kamata i otplate vanjskog i unutrašnjeg duga FBiH,
2. transfer za boračke invalidnine, druga boračka davanja i invalidnine za neratne invalide i civilne žrtve rata,
3. transfer za poljoprivredu i razvojni projekti,
4. transfer za raseljene i izbjegle osobe,
5. plaće i naknade troškova svih zaposlenih,
6. tekući transferi kantonima i nižim nivoima vlasti, javnim preduzećima i kapitalne investicije,
7. ostalo.

## **Član 12.**

Nepredviđeni budžetski izdaci koji se pojave tokom budžetske godine podmiruju se iz sredstava tekuće rezerve utvrđene Budžetom.

Raspodjelu sredstava odobrava Vlada u skladu sa Odlukom o kriterijima raspodjele finansijskih sredstava iz "Tekuće rezerve" Budžeta Federacije BiH („Službene novine Federacije BiH" broj: 9/08), a nakon dobivanja prijedloga Ministarstva finansija.

Budžetska izdvajanja za tekuću rezervu ne smiju preći 3% ukupnih prihoda isključujući primitke.

Uštede koje se ostvare u toku fiskalne godine mogu se prenijeti u Tekuću rezervu Budžeta do nivoa utvrđenog Zakonom o budžetima u Federaciji Bosne i Hercegovine («Službene novine Federacije BiH», broj: 19/06, 76/08, 5/09, 32/09, 51/09, 9/10, 36/10 i 45/10).

Premijer može raspolagati sredstvima iz Tekuće rezerve Budžeta do iznosa od 148.000 KM.

Zamjenici premijera mogu raspolagati sredstvima Tekuće rezerve Budžeta do iznosa od 80.000 KM.

Raspodjela sredstava iz stava 5. i 6. ovog člana odobrvat će se za nepredviđene izdatke budžetskim korisnicima u skladu sa utvrđenim kriterijima.

Izveštaji o utrošku finansijskih sredstava iz Tekuće rezerve podnose se Vladi Federacije BiH kvartalno u skladu sa Pravilnikom o finansijskom izvještavanju i godišnjem obračunu budžeta u Federaciji Bosni i Hercegovini («Službene novine Federacije BiH», broj: 17/05, 66/08 i 73/08).

### **Član 13.**

Ako se tokom godine, na osnovu zakona i drugog propisa, poveća djelokrug ili nadležnost korisnika što zahtijeva i povećana sredstva ili se osnuje novi korisnik, sredstva za njegove troškove osiguravaju se iz Tekuće rezerve Budžeta, a odobrava ih Vlada.

Ako se tokom godine, na osnovu zakona i drugog propisa, umanja djelokrug ili nadležnost korisnika, što zahtijeva smanjena sredstva, ili sam budžetski korisnik prestane postojati, neutrošena sredstva za njegove izdatke prenose se u Tekuću rezervu Budžeta ili na korisnika koji preuzme njegove poslove uz odobrenje Vlade.

### **Član 14.**

Korisnicima nije dopušteno stvarati obaveze, odnosno rashode ili opterećenja budžetskih pozicija, ako ti rashodi ili opterećenja budžetskih pozicija nisu odobreni u okviru iznosa alociranog u operativnom budžetu za tog korisnika.

Rashodi korisnika ne mogu prelaziti iznose alociranih budžetskih sredstava odobrenih za svaki mjesec ili drugi vremenski period koji je utvrdilo Ministarstvo finansija, osim uz saglasnost Ministarstva.

Ministar finansija ima pravo rješenjem obustaviti od izvršenja odluku koja je u suprotnosti s ovim zakonom i Zakonom o budžetima u Federaciji Bosne i Hercegovine.

## **Član 15.**

Rashode ili opterećenja budžetskih pozicija koja se plaćaju iz doznačenih transfera ili zajmova datih korisnicima ne mogu se realizirati bez instrukcija ministarstva finansija, a na osnovu prethodno dostavljenog zahtjeva korisnika.

## **Član 16.**

Svi javni prihodi koji pripadaju Budžetu, obavezno se uplaćuju na JRT, a koji se nalazi pod isključivim pravom Ministarstva finansija u skladu sa Zakonom o Trezoru u Federaciji Bosne i Hercegovine („Službene novine Federacije BiH“ broj: 58/02, 19/03, 79/07).

## **Član 17.**

Neiskorištene aproprijacije i opterećenja evidentirani na ekonomskim kodovima 611000, 612000, 613000, 616000 i 823000, ističu 31. januara naredne fiskalne godine.

Aproprijacije se mogu prenositi u narednu fiskalnu godinu za finansiranje kapitalnih projekata iz posebnih fondova, kao i za finansiranje projekata od posebnog značaja za razvoj privrede ili poboljšanja uspješnosti.

Aproprijacije u svrhu finansiranja višegodišnjih kapitalnih projekata prenose se na narednu fiskalnu godinu prema iznosima i vremenskom rasporedu utvrđenom u Dokumentu okvirnog budžeta.

## **Član 18.**

Pogrešno ili više uplaćeni prihodi u Budžet, vraćaju se uplatiocima na teret tih prihoda na osnovu rješenja koje donosi Ministarstvo finansija u skladu sa Pravilnikom o procedurama za povrat više ili pogrešno uplaćenih javnih prihoda sa Jedinog računa Trezora Federacije Bosne i Hercegovine („Službene novine Federacije BiH“ broj: 47/04).

## **Član 19.**

Ministarstvo finansija, na prijedlog budžetskog korisnika, može donijeti odluku o prestrukturiranju rashoda u okviru ukupnog iznosa odobrenog za budžetskog korisnika na pozicijama 611000, 612000, 613000, 614000, 615000 i 820000 najviše do 10% ukupno odobrenih rashoda za budžetskog korisnika.

## **Član 20.**

Sredstva na poziciji "Bruto plaće i naknade" osiguravaju se korisnicima Budžeta na osnovu Zakona o plaćama i naknadama u organima vlasti Federacije Bosne i Hercegovine („Službene novine Federacije BiH“, broj 45/10) i Zakona o plaćama i naknadama policijskih službenika Federacije Bosne i Hercegovine („Službene novine Federacije BiH“, broj 45/10), te Zakona o načinu ostvarivanja ušteta u Federaciji Bosne i Hercegovine („Službene novine Federacije BiH“ broj:50/09).

Sredstva sa pozicije "Naknade troškova zaposlenih" osiguravaju se korisnicima Budžeta na osnovu, Zakona o plaćama i naknadama u organima vlasti Federacije Bosne i Hercegovine („Službene novine Federacije BiH“, broj 45/10) i Zakona o plaćama i naknadama policijskih službenika Federacije Bosne i Hercegovine („Službene novine Federacije BiH“, broj 45/10), te Zakona o načinu ostvarivanja ušteta u Federaciji Bosne i Hercegovine („Službene novine Federacije BiH“ broj 50/09), Uredbe o naknadama koje pripadaju članovima Vlade Federacije Bosne i Hercegovine i njihovim savjetnicima koje nemaju karakter plaće („Službene novine Federacije BiH“ broj 87/10 i 22/11), Uredbe o naknadama koje nemaju karakter plaće („Službene novine Federacije BiH“, broj: 63/10, 22/11 i 66/11) i Općeg kolektivnog ugovora na teritoriji Federacije Bosne i Hercegovine („Službene novine Federacije BiH“ broj: 54/05).

## **Član 21.**

Visina dnevnica, naknada troškova za službena putovanja koji nastanu u vezi službenih putovanja za sve korisnike koji se finansiraju iz sredstava Budžeta određuje se na osnovu Uredbe o naknadama za službena putovanja („Službene novine Federacije BiH“, broj: 63/10, 9/11 i 80/11).

## **Član 22.**

Korisnicima se osiguravaju sredstva za obavezno osiguranje u skladu sa Zakonom o društvima za osiguranje u privatnom osiguranju („Službene novine Federacije BiH“ broj: 24/ 05).

Sredstva za naknadu štete na imovini koja nije osigurana prema stavu 1. ovog člana osiguravaju se u Budžetu i doznačavat će se korisnicima na njihov zahtjev.

## **Član 23.**

Postupak nabavke roba, radova i usluga mora se obavljati u skladu sa Zakonom o javnim nabavkama Bosne i Hercegovine („Službeni glasnik BiH“, broj: 49/04, 19/05 , 52/05, 8/06, 24/06, 70/06,12/09 i 60/10).

## **Član 24.**

Sredstva utvrđena u razdjelu 12. Budžeta, pozicija "Transfer za političke stranke i koalicije" rasporedit će na korisnike Vlada, po prethodno utvrđenim kriterijima.

Sredstva namijenjena za finansiranje političkih subjekata Vlada će rasporediti tako da 30% od predviđenog iznosa rasporedi na političke subjekte, koji su zastupljeni u Parlamentu Federacije Bosne i Hercegovine, u jednakim iznosima, a 70% prema broju poslanika u domovima Parlamenta.

Ukoliko je ugovorom između članica koalicije reguliran način raspodjele novčanih sredstava koja pripadaju koaliciji, sredstva koja na osnovu stava 2. ovog člana pripadaju koaliciji Vlada raspoređuje na osnovu odredbi ugovora.

Sredstva utvrđena u razdjelu 12. Budžeta, pozicija "Transfer za Fondaciju Srebrenica – Potočari", rasporedit će se na korisnike prema programima koje donosi Vlada.

Sredstva utvrđena u razdjelu 12. Budžeta, pozicija „Kapitalni transferi neprofitnim organizacijama – Obnova i izgradnja u ratu porušenih vjerskih objekata” koristit će se po programu koji donosi Vlada.

## **Član 25.**

Sredstva utvrđena u razdjelu 16. Budžeta, pozicija "Tekući transferi drugim nivoima vlasti – Kantoni ", koristit će se na osnovu Odluke o kriterijima raspodjele sredstava koje donosi Vlada.

Sredstva utvrđena u razdjelu 16. Budžeta, pozicije "Tekući transferi drugim nivoima vlasti – Transfer za sufinansiranje Fondacije za održivi razvoj OdRaz" i "Učešće Vlade u projektima koje finansira međunarodna zajednica", koristit će se po programima koje donosi Vlada.

## **Član 26.**

Sredstva utvrđena u razdjelu 17. Budžeta, pozicije „Subvencije javnim preduzećima - konsolidacija rudnika uglja u Federaciji BiH" i „Subvencije javnim preduzećima - Privrednim društvima u Federaciji BiH" koriste se po programu koji donosi Vlada.

## **Član 27.**

Sredstva utvrđena u razdjelu 18. Budžeta, pozicije „Subvencije javnim preduzećima" - Transfer željeznicama FBiH", „Subvencije javnim preduzećima - JP "B&H Airlines" d.o.o. Sarajevo" i "Kapitalni transferi javnim preduzećima-Sufinansiranje izgradnje dionice autoputa Koridor Vc", trošit će se prema programu koji donosi Vlada.

## **Član 28.**

Sredstva utvrđena u razdjelu 20. Budžeta, pozicije "Tekući transferi drugom nivou vlasti – liječenje od tuberkuloze neosiguranih lica", „Transfer za Zavod zdravstvenog osiguranja i reosiguranja FBiH“, „Transfer za Zavod za transfuzijsku medicinu FBiH“, „Tekući transfer drugim nivoima vlasti - AKAZ“, „Tekući transfer za prevenciju zloupotrebe opojnih droga“, „Tekući transfer drugom nivou vlasti – zdravstvena zaštita Roma u FBiH“ i „Transfer za zavod zdr.osig. i reosig. FBiH – za proces vakcinacije i suf. troškova raseljenih lica“ koristi se po programu koji donosi Vlada.

Federalno ministarstvo zdravstva će izvještavati Vladu o realizaciji programa liječenja, učestalosti oboljenja i drugim važnim pokazateljima u vezi implementacije programa Fonda solidarnosti Federacije Bosne i Hercegovine, utvrđenih Odlukom o utvrđivanju prioriternih vertikalnih programa zdravstvene zaštite od interesa za Federaciju Bosne i Hercegovine i prioriternih najsloženijih oblika zdravstvene zaštite iz određenih specijalističkih djelatnosti koje će se pružati osiguranim osobama na teritoriju Federacije Bosne i Hercegovine („Službene novine Federacije BiH“ br. 08/05, 11/07, 44/07, 97a/07, 33/08 i 52/08) kao i realizaciji sredstava Fonda solidarnosti Federacije Bosne i Hercegovine, na način i u rokovima predviđenim Zakonom o zdravstvenom osiguranju („Službene novine Federacije BiH“ br. 30/97, 07/02, 70/08 i 48/11).

## **Član 29.**

Sredstva utvrđena u razdjelu 22. Budžeta, pozicije „Strategija za povećanje sektorske efikasnosti izvozno – konkurentne proizvodnje – CEFTA“ i „Tekući transferi neprofitnim organizacijama – potpora udruženjima potrošača“ koristit će se po programima koje donosi Vlada.

## **Član 30.**

Sredstva utvrđena u razdjelu 23. Budžeta, pozicije „Tekući transferi drugim nivoima vlasti – za rješavanje problema Roma u oblasti stambenog zbrinjavanja“, „Tekući transferi drugim nivoima vlasti - za projekat utopljanja zgrada radi uštede energije“, „Tekući transferi drugim nivoima vlasti - za implementaciju Zakona o stanovima na kojima postoji stanarsko pravo“, i „Učešće Vlade Federacije BiH u sufinansiranju kantonalnih i lokalnih zajednica - zaštita nacionalnih spomenika“ koristit će se po programima koje donosi Vlada.

### **Član 31.**

Sredstva utvrđena u razdjelu 24. Budžeta, pozicije "Podsticaj za poljoprivredu" i "Podsticaj za veterinarstvo", koriste se po programu koji donosi Vlada, uz prethodno mišljenje nadležnog parlamentarnog odbora.

### **Član 32.**

Sredstva utvrđena u razdjelu 32. Budžeta, pozicije „Transfer za pomoć u liječenju boraca-branitelja“, „Transfer za podršku fondaciji za stambeno zbrinjavanje RVI i boračku populaciju“, „Transfer za temeljna udruženja proistekla iz posljednjeg domovinskog rata“, „Transfer za obilježavanje zanačajnih datuma“, „Transfer za sufinansiranje izgradnje spomen obilježja, uređenja mezarja i grobalja“ i „Transfer za sufinansiranje troškova sahrana i dženaza pripadnika braniteljskih populacija“, koristit će se po programima koje donosi Vlada.

Sredstva utvrđena u razdjelu 32. Budžeta, pozicija "Kapitalni transferi pojedincima – automobili za invalide", koristit će se na osnovu Uredbe o obezbjeđenju sredstava za nabavku putničkih automobila ratnim vojnim invalidima 100% prve grupe („Službene novine Federacije BiH" broj 58/06, 34/07 i 44/11).

### **Član 33.**

Sredstva utvrđena u razdjelu 50. Budžeta, pozicije „Tekući transferi drugim nivoima vlasti - Tekući transferi općinama i gradovima“, „Tekući transferi pojedincima - isplata stipendija i isplata inovatorima“, „Tekući transferi neprofitnim organizacijama - udruženjima građana, obrtničke komore FBiH i kantona i obrazovne institucije“ i „Subvencije privatnim preduzećima i poduzetnicima - Federalno ministarstvo razvoja, poduzetništva i obrta“ koriste se po programima koje donosi Vlada.

### **Član 34.**

Sredstva utvrđena u razdjelu 51. Budžeta, pozicije " Tekući transferi drugim nivoima vlasti – Zapošljavanje Roma", „Transfer za realizaciju aktivnosti predviđenih Uredbom o primjeni odgojnih preporuka prema maloljetnicima u FBiH", „Transfer za strategiju protiv maloljetničkog prestupništva“, „Transfer-Implementacija mjera iz Akcionog plana u okviru Strategije zapošljavanja u FBiH (2009-2013)", „Tekući transferi neprofitnim organizacijama – Strategija za izjednačavanje mogućnosti za osobe sa invaliditetom u FBiH 2011.-2014.", „Transfer za organizacije civilnih invalida“, „Transfer za implementaciju i uvođenje u prava neratnih invalida“, „Transfer za odvikavanje od ovisnosti“, „Provedba Zakona zaštite od nasilja nad članovima porodice“, „Tekući transferi neprofitnim organizacijama - Dječija nedjelja“, „Kapitalni transferi

neprofitnim organizacijama -Rekonstrukcija ustanova za zbrinjavanje na nivou FBiH", koristit će se po programima koje donosi Vlada.

### **Član 35.**

Sredstva utvrđena u razdjelu 52. Budžeta, pozicije "Transfer za kulturu od značaja za Federaciju", "Transfer udruženjima građana i organizacija iz oblasti kulture", "Transfer za sport od značaja za Federaciju", „Transfer za fond za izdavaštvo“, „Transfer za kinematografiju“, „Transfer za obnovu kulturnog i graditeljskog naslijeđa“, „Transfer Fondaciji za muzičke, scenske i likovne djelatnosti“, „Transfer Fondaciji za bibliotečku djelatnost“ i „Tekući transferi neprofitnim org. – Transfer za mlade“ koristit će se po programima koje donosi Vlada.

### **Član 36.**

Sredstva utvrđena u razdjelu 53. Budžeta, pozicije „Transfer za raseljena lica i povratnike“, „Transfer pojedincima – podrška povratku izbjeglica i prognanih osoba sa područja Posavine RS“, „Tekući transfer za programe podrške razvoja regije Srebrenica“, „Kapitalni transfer ( Podrška implementaciji održivom povratku izbjeglih i prognanih lica sa područja regije Srebrenica)“ koristit će se po programima koje donosi Vlada.

### **Član 37.**

Sredstva utvrđena u razdjelu 54. Budžeta, pozicije „Transfer za finansiranje studentskog standarda“, „Transfer za finansiranje obrazovanja“, „Transfer za implementaciju Bolonjskog procesa“, "Transfer za usluge recenziranja udžbenika za osnovno i srednje obrazovanje", „Transfer za oblast nauke od značaja za Federaciju“, „ Transfer za razvoj institucija nauke i podsticaj NIR od značaja za Federaciju BiH" i „Transfer za Fond za studentske zajmove“, koristit će se po programu koji donosi Vlada.

### **Član 38.**

Sredstva utvrđena u razdjelu 61. Budžeta pozicije „Transfer za sanaciju korita i vodopada Plive – Jajce“, „Transfer za sanaciju Počitelja“, „Transfer za sanaciju donjeg toka rijeke Trebižat slapovi Kravice i Koćuša“, „Transfer za NP „UNA“, „Akcijski plan Strategije okoliša“ i „Akcijski plan Strategije turizma Federacije BiH – transfer za razvoj turizma“, trošit će se namjenski prema programu koji donosi Vlada.

### **Član 39.**

Korisnici budžetskih sredstava su obavezni predložiti Vladi programe utroška sredstava iz čl. 24., 25., 26., 27., 28., 29., 30., 31., 32., 33., 34., 35., 36., 37. i 38. ovog zakona.

Bitni elementi programa su: naziv programa, svrha programa, kriterij za raspodjelu sredstava, visina sredstava, izvori sredstava i naziv korisnika sredstava.

Sredstva se ne mogu koristiti prije nego što Vlada odobri programe.

O utrošenim sredstvima iz stava 1. ovog člana korisnici izvještavaju Ministarstvo finansija, a Ministarstvo finansija Vladu u skladu sa Zakonom o budžetima u Federaciji Bosne i Hercegovine.

### **Član 40.**

Resorna ministarstva koja su nadležna za nadzor implementacije Razvojno - investicionih projekata iz Aneksa Budžeta u Federaciji Bosne i Hercegovine, finansiranih iz ino-kreditnih i donatorskih sredstava su dužna kvartalno dostavljati izvještaje Ministarstvu finansija o utrošku sredstava obuhvaćenih planom za 2012. godinu po projektima.

### **Član 41.**

Resorna ministarstva će osigurati transparentnost i efikasnost upravljanja finansijama. U svojim programima utroška sredstava iz čl. 24., 25., 26., 27., 28., 29., 30., 31., 32., 33., 34., 35., 36., 37., i 38. ovog zakona za finansijska sredstva koja se dodjeljuju na revolving osnovi korisnicima budžetskih sredstava, nadležna resorna ministarstva su obavezna regulisati ročnost povrata finansijskih sredstava na JRT Budžeta Federacije Bosne i Hercegovine.

### **Član 42.**

Prikupljanje javnih prihoda Budžeta vrši se preko računa javnih prihoda (depozitni račun).

Obavljanje platnih transakcija vrši se preko transakcijskih računa koji su sastavni dio JRT, a otvara ih Ministarstvo finansija.

Potpisnici naloga platnih transakcija putem računa iz st 1. i 2. ovog člana su:

- a) prvi potpisnik - ministar finansija Federacije BiH,

- b) drugi potpisnik – premijer Federacije BiH ili jedan od zamjenika premijera Federacije BiH.

#### **Član 43.**

Prihodi koje korisnici ostvaruju obavljanjem vlastite djelatnosti moraju se uplaćivati na depozitni račun javnih prihoda Budžeta.

Uplate na osnovu ostvarenih vlastitih prihoda korisnika Budžeta evidentirat će se kao vlastiti prihod svakog korisnika u Glavnoj knjizi Trezora.

U skladu s tim korisnici su obavezni da prilikom izrade svog dijela Budžeta planiraju rashode koji će biti pokriveni iz vlastitih prihoda.

#### **Član 44.**

Donacije i grantovi koji nisu planirani u Budžetu, a ostvare se u toku fiskalne godine namjenski će se usmjeravati odlukom resornog ministarstva, a budžetski korisnici koji nemaju resorno ministarstvo odlukom ministarstva finansija na prijedlog budžetskog korisnika.

Korištenje prihoda po osnovu namjenskih sredstava koji se uplaćuju na depozitni račun Budžeta Federacije BiH, u skladu sa Pravilnikom o načinu uplate javnih prihoda budžeta i vanbudžetskih fondova na teritoriji Federacije BiH („Službene novine Federacije BiH”, broj 3/11, 6/11, 9/11, 18/11, 39/11 i 64/11), a koja se ostvare u toku godine, odobrit će se odlukom Federalnog ministarstva finansija.

### **IV. Zaduživanje i upravljanje dugom**

#### **Član 45.**

Ministar finansija je, pored upravljanja prihodima i izdacima Ministarstva finansija, odgovoran u ime Vlade za računovodstvo i unutrašnji nadzor transakcija zaduženja i duga.

Ministarstvo finansija odgovorno je za potpuno i pravovremeno prikupljanje prihoda na JRT u skladu sa Zakonom o Trezoru Federacije Bosne i Hercegovine („Službene novine Federacije BiH“ broj: 58/02, 19/03 i 79/07) i odgovarajućim provedbenim propisima.

#### **Član 46.**

Finansijske obaveze preuzete u ime i za račun Federacije u skladu sa zakonom i drugim propisima čine dug Federacije i obaveze Federacije.

O visini zaduživanja Federacije i garancija Federacije odlučuje Parlament Federacije BiH na prijedlog Vlade.

#### **Član 47.**

Kratkoročni dug nastao radi finansiranja deficita iz gotovinskog toka otplatit će se tokom fiskalne godine. Ovaj dug ne može biti refinansiran niti može biti produžen rok za njegov povrat nakon isteka fiskalne godine i niti u jednom vremenskom periodu tokom fiskalne godine ne može preći 5% ostvarenih prihoda bez primitaka u prethodnoj fiskalnoj godini.

U izvanrednim okolnostima, visinu sredstava za finansiranje deficita, nastalog iz gotovinskog toka, a koji ugrožava funkcionisanje finansijskog sistema u Federaciji BiH, odobrava Parlament Federacije BiH na prijedlog Vlade Federacije BiH.

#### **Član 48.**

U upravljanju dugovima u Federaciji, Federacija i kantoni zajedno se dogovaraju i određuju gornji nivo konsolidiranog duga Federacije.

#### **Član 49.**

Za upravljanje dugom nadležno je Ministarstvo finansija.

### **V. Kaznene odredbe**

#### **Član 50.**

Odgovorno lice korisnika, nosilac izvršne vlasti, kao i drugo lice odgovorno za Budžet kazniće se za prekršaj koji napravi, u skladu sa odredbama člana 78. Zakona o budžetima u Federaciji Bosne i Hercegovine.

### **VI. Prijelazne i završne odredbe**

#### **Član 51.**

Troškovi za institucije Federacije koje prelaze na nivo Bosne i Hercegovine u potpunosti će se prenijeti u budžet institucija BiH zajedno sa budžetskim

pozicijama Budžeta Federacije Bosne i Hercegovine za 2012. godinu za ove funkcije. Vlada će doznačiti u budžet institucija BiH iznose predviđene u Budžetu Federacije Bosne i Hercegovine za 2012. godinu za finansiranje institucija Bosne i Hercegovine i to proporcionalno na mjesečnoj osnovi počevši od mjeseca u kojem rashodi na osnovu prijenosa funkcija postanu efektivni.

#### **Član 52.**

Budžetom za 2012. godinu će se izvršiti prijenos rashoda na osnovu prijenosa nadležnosti i funkcija sa entitetskog nivoa na državni nivo.

#### **Član 53.**

U slučaju da drugi zakoni i propisi sadrže odredbe o načinu izvršavanja Budžeta i pravima i obavezama korisnika budžetskih sredstava, koje su u suprotnosti s ovim Zakonom, primjenjivat će se odredbe ovog zakona.

#### **Član 54.**

Ovaj zakon stupa na snagu narednog dana od dana objavljivanja u "Službenim novinama Federacije BiH", a primjenjivat će se na fiskalnu 2012. godinu.